

ယာကုပ်

ယာကုပ်ဆေမု ပေးစာ

နိဒါန်း

ယာကုပ်ဆေမု ပေးစာ ဟို ယာကုပ် တတ်တိုင်း ရေးသားထားလဲ့ စာဖြစ်အယ်။ ဟေဟာဟ အစောပိုင်း အသင်းတော်တွင် ခေါင်းဆောင်တယောက် ဖြစ်ပင်း ယေရှုရုလင်ကောင်စီရဲ့ အစိတ်အပိုင်း တခုဖြစ်သော ယေရှုရဲ့ ညီယာကုပ် (တ ၁၅.၁၃) ဖြစ်အယ်။ တမန်တော်ပေါလုဟ သူ့ဟို ဂလာတီ ၂.၉ တွင် အသင်းတော်ရဲ့ မှတ်တိုင်ဟုလည်း ခေါ်ဆိုခဲ့အယ်။ ယာကုပ်ပအုပ်ဟို ခရစ်တော် မွေးဖွားပင်းနောက် ၅၀ ခုနှစ်ခန့်တွင် ရေးသားခဲ့တာဟု ပညာဆိုင်ရာများဟ ယုံကြည်ကြအယ်။ ယာကုပ်ဟ ယေရှုရုလင် မြို့ဆီ အသင်းတော် ခေါင်းဆောင်တယောက် ဖြစ်သော ကျောနဲ့ သူဟ အဲနေရာတွင် နေထိန်နေစဉ် ပအုပ်ဟို ရေးခဲ့အယ်။

ယာကုပ်ဟ သူရဲ့ ပအုပ်တွင် လူမျိုးလို့ရဲ့ “ပြန်ကျနေသော ဆယ့်နေနွယ်” (၁.၁) ဟို လိပ်မူထားအယ်။ ယာကုပ်ဆီ သင်ခန်းစာများဟ ခရစ်ယာန်အားလုံးနဲ့ သက်ဆိုင်သော်လည်း၊ “ဆယ့်နေနွယ်လို့” ဟူသော စကားလုံးဟို အသုံးပြုခြင်းသည် ဟေပအုပ်ဟ ယုဒခရစ်ယာန်များဆေ

ဟို တိုက်ရိုက်ရေးသားခြင်း ဖြစ်နိုင်တာဟု ဖော်ပြအယ်။ အရပ်ရပ်နှိုက် ဆီသော စာဖတ်သူများဆေ ရောက်ဆီ စေရန်၊ ၎င်းဟ ယာကုပ်သည် ယုံကြည်ခြင်းနဲ့ လုပ်ရပ်များ ကြား ဆက်ဆံရေး ဟို အဓိက ထား လုပ်ဆောင်လဲ အကျောန်းအရာများစွာဟို ကိုင်တွယ် ဖြေဆွင်းခဲ့အယ်။ စစ်မန်သော ယုံကြည်ခြင်းဆီသူဟ အကျင့်တရားအားဖြင့် (၂.၁၇) ပေါ်လွင်စေရမယ်။ ချမ်းသာလဲ့သူတွေ ဟို သဘောထားကြီးလဲ့ စိတ်မပြုဖို့လည်း သတိပေးအယ် (၂.၁-၄) အဲပင်းနောက် ငါလို့ပြောတာတွေဟို သတိထားဖို့ ပြောအယ် (၃.၁-၁၂)။

အကျဉ်းချုပ်

၁။ ယာကုပ်ဟ သူ့စာဖတ်သူတွေဟို နှုတ်ဆက်အယ် (၁.၁)

၂။ အဲပင်းနောက်၊ ခရစ်ယာန်များအား ဆင်းရဲဒုက္ခ ခံရသော အဲချိန်တွင် ခံနိုင်ရည်ဆီရန် သူတိုက်တွန်းထားအယ် (၁.၂-၂၇)

၃။ အဲပင်းရင်၊ သူဟ လုပ်ရပ်အားဖြင့် ယုံကြည်ခြင်းအား ပြသရန် လိုအပ်ကျောန်း ပြောအယ် (၂.၁-၂၆)

၄။ အဲဒီနောက်မှာ၊ သူဟ အစွမ်းထက်သော စကားများ ဟို စလိုဖြစ်နိုင်ကျောန်း ပြောအယ် (၃.၁-၁၂)

၅။ အဲပင်းရင်၊ ယာကုပ်ဟ ဘုရားသခင်ရဲ့ ဉာဏ်ပညာဟ ဉာဏ်ပညာထက် စလို ကွာခြားတာဟို ဆွင်းပြအယ် (၃.၁၃-၄.၁၀)

၆။ အဲပင်းနောက်၊ သူဟ သူရဲ့ စာဖတ်သူများဟို
ဝါကြွေးခြင်း မပြုရန် သတိပေးအယ် (၄.၁၁—၅.၆)
၇။ ယာကုပ်ဟ ယေဘုယျ အကြံပြုချက် အချို့ဟို ပေး
ခြင်းဖြင့် အခန်း ၅ တွင် သူရဲ့ ပအုပ်ဟို အပီးသတ်
အယ် (၅.၇-၂၀)

¹ ဘုရားသခင်နဲ့ သခင် ယေရှု ခရစ်တော်ရဲ့ အစေခံ
ဖြစ်သော ငါ ယာကုပ်ဟ၊
အရပ်ရပ်လို့နှိုက် ကွဲပြားသော တဆယ့်နေပါးသော
အမျိုးလို့ဟို၊
နှုတ်ဆက်လိုက်အယ်။

ယုံကြည်ခြင်းနဲ့ ဉာဏ်ပညာ

² ငါ့ ညီအကို မောင်နှမလို့၊ နင်လို့ဟ အမျိုးမျိုးသော
စုံစမ်းနှောင့်ယှက်ခြင်းနဲ့ ကြုံတွေ့ရသောအခါ ဝမ်းမြောက်
စရာ သက်သက်ဖြစ်တာဟု မှတ်ယူကြလော့။

³ ပစာကို နင်လို့ရဲ့ ယုံကြည်ခြင်းဟို စစ်ကြောစုံစမ်း
ခြင်းဟ သည်းခံခြင်းဟို ဖြစ်ပေါ်စေကျောန်း နင်လို့ သိ
ကြအယ်။

⁴ နင်လို့ဟ စလိုချို့တဲ့မှု မဆိဘဲ ရင့်ကျက်ယွေ့ ပြေစုံ
သောသူဖြစ်မဲ့အကျောန်း အဲသည်းခံခြင်း စုံလင်လဲ့တိုင်
အောက် ပြုစုကြလော့။

⁵ နင်လို့ထဲတွင် ဉာဏ်ပညာ လိုအပ်သောသူဆိုရင် ကဲ့ရဲ့ ပစ်တင်ခြင်းဟို မပြုဘဲ ခပ်သိမ်းသောသူလို့အား ရက်ရောစွာ ပေးသော ဘုရားသခင်ဆေ တောင်းဆောက်စေ၊ အဲလို တောင်းရင် ရလိမ့်မယ်။

⁶ အားပေမဲ့ နင်လို့ဟ ယုံမားသံသယ မဆိဘဲ ယုံကြည်သောစိတ်နဲ့ တောင်းဆောက်ကြရမယ်။ ပစာကို ယုံမားသံသယ ဆိသောသူဟ လေတိုက်ယွေ လှုပ်ဆွားနေသော ပင်လယ်လှိုင်းတံပိုးနဲ့ တူအယ်။

⁷⁻⁸ အေးလိုလူဟ စိတ်နေခွဆိသူ၊ ပြုလေသမျှလို့နှိုက်တည်ကြည်မှု မဆိသူဖြစ်သောကျေနဲ့ ထာဝရဘုရား ဆေမှ တစုံတရာဟို ရဆိလိမ့်မယ်ဟု မထင်မှတ်စေနဲ့။

ဆင်းရဲခြင်းနဲ့ ချမ်းသာခြင်း

⁹ ညီအကိုလို့ တစုံတယောက်ဟ မိမိအား နိမ့်ကျလဲ အခြေအနေမှ ဘုရားသခင် မြင့်တင်ပေးလိုက်သောအခါ ဝမ်းမြောက်စေ၊

¹⁰ ချမ်းသာ ကြွယ်ဝသော ညီ အကို ဟ မိမိ အား ဘုရားသခင် နိမ့်ကျစေသောအခါ ဝမ်းမြောက်ရမယ်။ အကျေနဲ့မှာ ချမ်းသာသောသူဟ မြက်ပွင့်လို ညှိုးနွမ်းပျောက်ပျယ် သွားလိမ့်မယ်။

¹¹ နေဟ ပူသောအရှိန်နဲ့ ထွက်သောအခါ မြက်ပင်ဟ သွေ့ခြောက်ခြင်းဟို ရောက်ယွေ မြက်ပွင့်လည်း ကြွေတတ်အယ်၊ တင့်တယ်သော အသွေးအဆင်းလည်း ပျောက်ပျက်တတ်အယ်။ အဲတိုင်းတိုင်း ငွေရတတ်သော

သူဟု မိမိအမှုအရာလို့နှိုက် ညှိုးနွမ်းပျောက်ပျယ်ခြင်းကို ရောက်တတ်အယ်။

စုံစမ်းခြင်းနဲ့ သွေးဆောင်ခြင်း

¹² စုံစမ်းနှောင့်ယှက်ခြင်းကို သည်းခံသောသူဟု မိမိ လာဆီအယ်။ အကျောန်းမှာ စစ်ကြာစုံစမ်းခြင်းကို ခံပင်း မှ ဘုရားသခင်ကို ချစ်သောသူလို့အား ကတိထားသော အသက်သရဖူကို ရလိမ့်မယ်။

¹³ စုံစမ်းသွေးဆောင်ခြင်းကို ခံရသူဟု “ဘုရားသခင် သည် ငါ့ကို ဖြားယောင်းသွေးဆောင်အယ်” ဟု စသူ မျှ မပြောနဲ့။ အကျောန်းမှာ မကောင်းမှုဟု ဘုရားသခင် ကို မသွေးဆောင်နိုင်ရာ၊ ကိုယ်တော်ဟုလည်း စသူဟိုမျှ သွေးဆောင်တော်မမူ။

¹⁴ လူဟု စုံစမ်းသွေးဆောင်ခြင်း ခံရတာဆိုတာဟု မိမိ ရဲ့ ဆိုးညစ်သော လိုအင်ဆန္ဒဆွဲဆောင်ရာကို လိုက်ပါခြင်း ဖြစ်အယ်။

¹⁵ အဲအခါ တပ်မက်ခြင်းဟု သန္ဓေတည်ယွေ့ အပစ်ကို ဖွားမြော်ပင်း အပစ်ဟု ကြီးထွားလာသောအခါ သေခြင်း ကို ဖွားမြော်အယ်။

¹⁶ ငါ ချစ်သော ညီအကို မောင်နှမလို့၊ အလွဲမယူကြနဲ့။

¹⁷ ကောင်းမြတ်စုံလင်သော ဆုကျေးဇူးမန်သမျှဟု ခေါ် န်ခင်မှ လည်းကောင်း၊ ခေါ်န်ခင် အလင်းတန်ဆာများကို ဖန်ဆင်းသော ဘုရားသခင်ရဲ့ ဆေမှ လည်းကောင်း သက်

ဆင်းယွေ့ လာအယ်။ ကိုယ်တော်ဟ ရွေ့လျော့တိမ်းယိမ်းခြင်း မဆီ၊ ပြောင်းလဲခြင်း အရိပ်နဲ့ ကင်းလွတ်အယ်။

¹⁸ ကိုယ်တော်ဟ မိမိဖန်ဆင်းသောအရာလို့တွင် ငါလို့ဟို အဦးသီးသဖွယ် ဖြစ်စေရန် အလိုတော်ဆီလဲ့အတိုင်း သမ္မာတရားနဲ့ဆိုင်သော နှုတ်ကပတ်တော်အားဖြင့် ငါလို့ဟို ဖြစ်ပွားစေအယ်။

ကြားနာခြင်းနဲ့ ကျင့်သုံးခြင်း

¹⁹ ငါ ချစ်သော ညီအကို မောင်နှမလို့၊ ဟေအချက်ဟို သိမှတ်ကြလော့။ လူတိုင်းဟ ကြားနာခြင်းအရာနှိုက်လျင်မြန်ယွေ့ စကားပြောခြင်းနဲ့ အမျက်ထွက်ခြင်း အရာလို့နှိုက် နှေးကွေးကြစေ။

²⁰ အကျောန်းမှာ လူရဲ့ အမျက်ဒေါသဟ ဘုရားသခင်ရဲ့ ဖြောင့်မတ်ခြင်းတရားဟို မဖြစ်ထွန်းစေနိုင်နဲ့။

²¹ အဲလိုမို့ နင် လို့ဟ ညစ်ညမ်းလဲ့ အလေ့အထ နဲ့ ဆိုးယုတ်လဲ့ အကျင့်မန်သမျှလို့ဟို ပယ်ဆွားကြလော့။ နင်လို့ရဲ့ စိတ်အတွင်းနှိုက် ဘုရားသခင် သွင်းပေးသော တရားတော်ဟ နင်လို့ဟို ကယ်တင်နိုင်အယ်။ တရားတော်ဟို သိမ့်မွေ့စွာ ခံယူကြလော့။

²² နှုတ်ကပတ်တရားဟို လိုက်နာကျင့်သုံးသောသူများ ဖြစ်ကြလော့။ မိမိတတ်တိုင်း လှည့်စားယွေ့ ကြားနာသူ သက်သက် မဖြစ်ကြနဲ့။

23 စသူမဆို နှုတ်ကပတ်တော်ကို ကြားနာသော်လည်း လိုက်နာကျင့်သုံးခြင်း မဆီရင် အဲသူဟ မိမိရဲ့ ပကတိ မျက်နှာဟို မန်ထဲမှာ ကျေသောသူနဲ့ တူအယ်။

24 အကျောန်းမှာ သူဟ မိမိတတ်တိုင်း ကျေပင်း ထွက် ခွာသွားတာနဲ့ မိမိဟ စလို ပုံသဏ္ဌာန်ဆီတာဟို ခုတုံး မေ့လျော့သွားတတ်အယ်။

25 အား ပေ မဲ့ လူ လို့ အား အ ပစ် အနှောင်အဖွဲ့မှ လွတ်မြောက်စေသော စုံလင်လွဲတရားဟို သေချာစွာ လေ့လာကျေရုံသောသူဟ တရားနာရုံသာ နာယွေ့ မေ့လျော့သောသူ မဟုတ်ဘဲ ဆက်လက် အာရုံပြုကာ လက်တွေ့ကျင့်သုံးသောသူဖြစ်သဖြင့် စလိုအမှုမျိုးဟို ပြုတာမဆို ဘုရားသခင်ရဲ့ ကောင်းချီးမင်္ဂလာဟို ခံစားရလိမ့်မယ်။

26 တ စုံတ ယောက် ဟ မိမိ ကိုယ် ဟို ဘုရား တရား ကြည်ညိုသူဟု ယူဆသော်လည်း မိမိရဲ့ လျှာဟို မထိန်း နိန်ရင် မိမိတတ်တိုင်း လှည့်စားသူဖြစ်အယ်။ သူရဲ့ ဘုရား တရား ကြည်ညိုမှုဟလည်း အလကားကား ဖြစ်အယ်။

27 ခမည်းတော် ဘုရားသခင်ဆွေနှိုက် စင်ကြယ်ယွေ့ညစ်ညူးခြင်း ကင်းသော ဘာသာတရား ကိုင်းရှိုင်းမှုဆိုတာဟ ဆင်းရဲဒုက္ခခံရသော မိဘမဆီလဲ့ လပွဲသငယ်များနဲ့ မှုဆိုးမလို့ဟို ကျေရုံခြင်း၊ လောကီအညစ်ကြေးလို့နဲ့ ကင်းစင်စေရန် မိမိတတ်တိုင်း စောင့်ထိန်းခြင်း ဖြစ်အယ်။

2

မျက်နှာမလိုက်ရန် သတိပေးခြင်း

၁ ငါ ညီအကို မောင်နှမလို့၊ ဘုန်းအသရေနဲ့ ပြောစုံသော ငါလို့ သခင် ယေရှု ခရစ်တော်ဟို ယုံကြည်ခြင်းအရာနှိုက် လူမျက်နှာဟို ထောက်ခြင်း မဆံ့ကြနဲ့။

၂ အကယ်ယွေ နင်လို့ရဲ့ စည်းဝေးရာဟို ဝင်လာသော လူနေယောက်အနက် လူတယောက်ဟ ဆွေလက်စွပ်နဲ့ ဝတ်ကောင်းစားလများဟို ဝတ်ဆင်ထားယွေ အခြားတ ယောက်ဟ ဆင်းရဲနွမ်းပါးသူ ဖြစ်သဖြင့် စုတ်ပြတ်သော အဝတ်ဟို ဝတ်ဆင်ထားအယ်။

၃ နင်လို့ဟ တင့်တယ်သော အဝတ် ဝတ်ဆင်ထားသော သူဟို ဂရုစိုက်လျက် “နင်ဟ ဟေနေရာကောင်းတွင် ထိန် မန့်” ဟု ဆိုယွေ ဆင်းရဲသောသူအား နင်ဟ “အဲနေရာတွင် ရပ်မန့်၊ ငါရဲ့ ခြေရင်း ကြမ်းပြင်ပေါ်နှိုက် ထိန်မန့်” ဟု ဆို ရင်

၄ နင် လို့ဟ အချင်းချင်း ကြားနှိုက် လူတန်းစား ခွဲ ခြားယွေ မ ကောင်းသော တွေးတော ကြံစည်မှု လို့ဖြင့် တရားစီရင်သူများ ဖြစ်ကြပီ မဟုတ်လော။

၅ ငါ ချစ်သော ညီအကို မောင်နှမလို့၊ နားထောင် ကြလော့။ ဘုရားသခင် ဟ ဟေ လောကတွင် ဆင်းရဲ သော သူ လို့ဟို ယုံကြည် ခြင်း နှိုက် ကြွယ်ဝသော သူ အဖြစ် လည်းကောင်း၊ ကိုယ်တော်ဟို ချစ်သောသူလို့အား ကတိထားသော နိုင်ငံတော်ဟို အမွေဆက်ဆံသူအဖြစ် လည်းကောင်း ရွေးကောက်တာ မဟုတ်လော။

၆ အားပေမဲ့ နင်လို့ဟ ဆင်းရဲသောသူလို့ဟို မထီမဲ့မြင်

ပြုကြအယ်။ ချမ်းသာသောသူလို့ဟ နှင်လို့ဟို ညှဉ်းဆဲ
နှိပ်စက်ကြတာ မဟုတ်လော။ သူလို့ဟ နှင်လို့အား
တရားရုံးဟို ဆွဲခေါ်သွားကြတာ မဟုတ်လော။

⁷ နှင်လို့ ခံယူရဆဲလဲ နာမတော်မြတ်ဟို ကဲ့ရဲ့ကြတာ
မဟုတ်လော။

⁸ နှင်လို့ဟ ကျမ်းစာနဲ့ အညီ “ကိုယ့်အိုင်နီးချင်းဟို ကိုယ်
နဲ့အမျှ ချစ်ရမယ်” ဟု မွန်မြတ်လဲ ပညတ်တရားဟို အမန်
တကယ် စောင့်ထိန်းရင် ကောင်းသောအမှုဟို ပြုကြလေ
ပီ။

⁹ အားပေမဲ့ မျက်နှာလိုက်ရင် နှင်လို့ဟ အပစ်ပြုကြတာ
ဖြစ်ယွေ့ ဖောက်ဖျက်ကျူးလွန်သောသူအဖြစ် ပညတ်
တရားအားဖြင့် အပစ်ဖော်ပြခြင်းဟို ခံရမယ်။

¹⁰ ပစာကို ပညတ်တရား အလုံးစုံဟို စောင့်ထိန်း
သော်လည်း တပါးဟို မားရင် ပညတ်တရား အလုံးစုံဟို
ကျူးလွန်ရာ ရောက်အယ်။

¹¹ အကျောန်းမှာ “အိုင်ထောင်ရေး ဖောက်ပြန်မှုဟို မ
ကျူးလွန်ရ” ဟု ပညတ်သောသူဟ “လူ မသတ်ရ” ဟု
ပညတ်အယ်။ အဲလိုမို့ နှင်ဟ အိုင်ထောင်ရေး ဖောက်ပြန်မှု
ဟို မကျူးလွန်သော်လည်း လူသတ်ရင် ပညတ်တရားဟို
ဖောက်ဖျက်ကျူးလွန်သူ ဖြစ်အယ်။

¹² အဲကျောန့် လွတ်လပ်ခြင်းနဲ့ဆိုင်သော တရားတော်
အားဖြင့် စီရင်ခြင်း ခံရမဲ့သူများလို ပြောဆိုကျင့်ကြံ
လော။

¹³ ပစာကို သနားကရုဏာ မဆီသူသောသူဟ ကရုဏာ

ကင်းသော တရားစီရင်ခြင်းဟို ခံရလိမ့်မယ်။ အားပေ
မဲ့ သနားကရုဏာဟ တရားစီရင်ခြင်းအပေါ် အောက်မြင်
တတ်အယ်။

ယုံကြည်ခြင်းနဲ့ အကျင့်

14 ငါ့ညီ အကို မောင်နှမ လို့၊ လူ တ စုံ တ ယောက်
ဟ ယုံကြည်အယ်ဟု ဆိုသော်လည်း အကျင့်အားဖြင့်
သက်သေမပြနိုင်ရင် ပစ္စ အကျိုးဆံ့မှာလုန်း။ အဲယုံကြည်
ခြင်းဟ သူ့အား ကယ်တင်နိုင်မှာလုန်း။

15 ညီ အကို မောင်နှမ လို့ဟ အဝတ် အချည်းစည်း
နေလျက် နေ့စဉ် လိုအပ်သော အစားအစာလည်း မဆံ
သောအခါ

16 နင်လို့ထဲမှ တစုံတယောက်ဟ “ငြိမ်းချမ်းစွာ သွားကြ
လော့။ နွေးထွေးစွာ နေယွေ့ ဝလင်စွာ စားကြလော့” ဟု
သူလို့အား ဆိုလျက် သူလို့ရဲ့ ကိုယ်ခန္ဓာအတွက် လိုအပ်
သောအရာများဟို မပေးဘဲနေရင် စလို အကျိုးဆံ့မှာလု
န်း။

17 ယုံကြည်ခြင်းဟလည်း အဲတိုင်းတိုင်း ဖြစ်အယ်။
အကျင့်နဲ့ ကင်းသော ယုံကြည်ခြင်းဟ တပါးတည်းဆံ
သောကျောနဲ့ အသေ ဖြစ်အယ်။

18 အားပေမဲ့ “နင်နှိုက် ယုံကြည်ခြင်း ဆီယွေ့ ငါနှိုက်
လုပ်ဆောင်မှု ဆီအယ်” ဟု အချို့သောသူဟ ပြောဆိုလိမ့်
မယ်။ အဲလိုမို့ အကျင့်ကင်းသော နင်ရဲ့ ယုံကြည်ခြင်းဟို

ငါ့အား ပြလော့။ ငါဟလည်း ငါ့ရဲ့ အကျင့်အားဖြင့် ငါ့ရဲ့ ယုံကြည်ခြင်းဟို နှင့်အား ပြမယ်။

¹⁹ ဘုရားသခင် တဆူတည်း ဆီကျောန်းဟို နှင်ဟ ယုံကြည်အယ်။ ကောင်းအယ်။ နတ်ဆိုးလို့ပင် ယုံကြည် ယွေ့ကြောက်ရွံ့တုန်လှုပ်ကြအယ်။

²⁰ အချင်း လူမိုက် အကျင့်ကင်းသော ယုံကြည်ခြင်းဟ အကျိုးမဆီကျောန်း* နှင် သိလိုသလော။

²¹ ငါလို့အဖ အာဗြဟံဟ ဘုရားသခင်နဲ့ မန်ကန်မှုဟို စ လို ရဆိန်နီမှာလုန်း။ သူဟ မိမိသား ဣဇက်ဟို ပလ္လင်ပေါ် တွင် ပူဇော်သောအခါ အကျင့်အားဖြင့် ရဆိအယ်။

²² သူရဲ့ ယုံကြည်ခြင်းဟ အကျင့်နဲ့ အတူဆီနေတာဟို နှင် မသိမမျောသလော၊ အကျင့်အားဖြင့် သူရဲ့ ယုံကြည် ခြင်းဟို ပြေစုံလင်ယွေ့ လာအယ်။

²³ အဲအခါ “အာဗြဟံဟ ဘုရားသခင်ဟို ယုံကြည် သဖြင့် အဲယုံကြည်ခြင်းဟို သူရဲ့ ဖြောင့်မတ်ခြင်းအဖြစ် သတ်မှတ်အယ်” ဟူသော ကျမ်းစာချက်ဟ ပြေစုံခြင်းဟို ရောက်အယ်။ အာဗြဟံဟလည်း ဘုရားသခင်ရဲ့ မိတ်ဆွေ ဟု ခေါ်ခြင်းဟို ခံရအယ်။

²⁴ လူဟ ယုံကြည်ခြင်းအားဖြင့်သာ ဖြောင့်မတ်ရာဟို ရောက်တာ မဟုတ်၊ အကျင့်အားဖြင့် ရောက်တာဟို နှင် လို့ သိမျောရကြအယ်။

²⁵ အဲတိုင်းတိုင်း ပြေတန်ဆာ ရာခပ်ဟ ဣသရေလ

* **2:20** အကျိုးမဆီကျောန်း၊ အချို့ လက်ရေးမူကျမ်းများတွင် သေခြင်းအကျောန်း၊ ဟု ပါဆိအယ်။

သူလျှိုလို့ဟို ကြုံဆို လက်ခံပင်းနောက် အခြားသောလမ်း
ဖြင့် ထွက်သွားနိုင်ရန် ကူညီပေးခဲ့ပင်း သူမရဲ့ အကျင့်
အားဖြင့် ဖြောင့်မတ်ရာဟို ရောက်တာ မဟုတ်လော။

²⁶ အဲကျောနဲ့ ဝိညာဉ်နဲ့ ကင်းသော ကိုယ်ခန္ဓာဟ အသေ
ဖြစ်သလို အကျင့်နဲ့ ကင်းသော ယုံကြည်ခြင်းဟလည်း
အသေဖြစ်အယ်။

3

လျှာဟို ချုပ်တည်းခြင်း

¹ ငါ့ ညီအကို မောင်နှမလို့၊ ဆရာဖြစ်သော ငါလို့ဟ
အခြားသူများထက် ပိုယွေ့ ကျပ်တည်းသော တရားစီရင်
ခြင်းဟို ခံရမယ်ဖြစ်ကျောနဲ့ သိမှတ်လျက် ဆရာဖြစ်သူ
မများစေကြနဲ့။

² ငါလို့ဆိုသမျှဟ ရမ်းဆွဲ မားယွင်း တတ်ကြအယ်။ စ
သူမဆို စကားပြောခြင်းအရာနှိုက် မားယွင်းခြင်း မဆီရင်
အဲသူဟ မိမိကိုယ်ခန္ဓာ တခုလုံးဟိုလည်း ချုပ်တည်းနိုင်လဲ
စုံလင်သောသူ ဖြစ်အယ်။

³ ငါလို့ဟို နာခံစေရန် မြင်းရဲ့ စလောင်ထဲဟို ဇက်ခွံ
သောအခါ သူရဲ့ ကိုယ်ခန္ဓာ တခုလုံးဟို ငါလို့ ဝေခံနိုင်အယ်။

⁴ အဲဟာမဟုတ်ရင် သင်္ဘောဟိုလည်း ကျေလော့။ ရ
မ်းဆွဲ ကြီးမားယွေ့ လေပြင်းတိုက်ရာဟို လွင့်ပါတတ်
သော်လည်း ကတစ်သော တက်မအားဖြင့် တက်မကိုင် အ
လိုဆီရာဘက်ဟို ဝေခံနိုင်အယ်။

5 အဲတိုင်းတိုင်း လျှာဟလည်း ကတစ်သော အင်္ဂါ အစိတ်အပိုင်း ဖြစ်သော်လည်း ရမ်းဆွဲ ဝါကြွားတတ် အယ်။

ရမ်းဆွဲကြီးသော သစ်တောဟို ကတစ်သော မီးဟ လောင်ကျွမ်းစေနိုင်တာဟို စဉ်းစားကျေ့လော့။

6 လျှာဟ မီးနဲ့ တူယွေ့ အပစ်ဒုစရိုက်ဖြင့် ပြောသော လောက ဖြစ်အယ်။ ၎င်းဟ ကိုယ်အင်္ဂါ အစိတ်အပိုင်း တ ခုအဖြစ်ဖြင့် တည်ဆဲကာ၊ ငါလို့ရဲ့ ကိုယ်ခန္ဓာ တခုလုံးဟို အပစ်ဒုစရိုက် ကူးစက်ပျံ့နှံ့စေအယ်။ လျှာဟ ငရဲမှ ရဆဲ လဲ့ မီးဖြင့် ငါလို့ရဲ့ ဖဝါတခုလုံးဟို လောင်ကျွမ်းစေတတ် အယ်။

7 လူသားလို့ဟ သားရဲတိရစ္ဆာန်နဲ့ ကျေးငက်မျိုးမှ စ ယွေ့ တွားသွားသတ္တဝါနဲ့ ယေသတ္တဝါမျိုး အပေါင်းလို့ဟို ယဉ်ပါးစေသလို ယဉ်လည်း ယဉ်ပါးစေခဲ့ကြအယ်။

8 အားပေမဲ့ လျှာဟို ယဉ်ပါးစေနိုင်သူ တစုံတဦးမျှ မဆိ။ လျှာဟ ထိန်းချုပ်ယွေ့ မရနိုင်သော အဆိုးအညစ် ဖြစ် ပင်း သေစေတတ်သော အဆိပ်အတောက်နဲ့ ပြေ့လျက် ဆိ အယ်။

9 ငါလို့ဟ လျှာဖြင့် ခမည်းတော်ဖြစ်သော ထာဝရဘုရား ရဲ့ ကျေးဇူး တော် ဟို ချီးမွန်းလျက် ဘုရားသခင် ရဲ့ ပုံသဏ္ဌာန်တော်နဲ့အညီ ဖန်ဆင်းခံရသောသူလို့ဟို အဲလျှာ ဖြင့် ကျိန်ဆဲတတ်ကြအယ်။

10 စလောင်တခုထဲမှ ကျေးဇူးတော် ချီးမွန်းခြင်း နဲ့ ကျိန်ဆဲခြင်းတို့ ထွက်လာတတ်သလော။ ညီအကို

မောင်နှမလို့၊ ဟေလို မဖြစ်သင့်။

11 စမ်းယေပေါက်တခုထဲမှ ချိုသောယေနဲ့ ခါးသောယေ ထွက်တတ်သလော။

12 ညီအကို မောင်နှမလို့၊ သဘောသဖန်းပင်ဟ သံလွင် သီးများဟို သီးနိန်သလော။ စပျစ်ပင်ဟ သဖန်းသီးများ ဟို သီးနိန်သလော။ အဲတိုင်းတိုင်း ငန်သောယေဟလည်း ချိုသောယေဟို မဖြစ်စေနိန်။

အထက်အရပ်မှ လာလဲ့ ပညာ

13 နင်လို့တွင် စသူဟ ပညာဆိပင်း တတ်သိလိမ္မာသူ ဖြစ်လုန်း။ အဲသူဟ ပညာရဲ့ နူးညံ့သိမ်မွေ့ခြင်းနှိုက် တည်သော မိမိရဲ့ လုပ်ဆောင်မှုလို့ဟို ကောင်းသော အသက်ဆု င်နေထိန်မှုအားဖြင့် သက်သေပြမန်။

14 အားပေမဲ့ နင်လို့ရဲ့ စိတ်နေလုံးထဲနှိုက် ခါးသီးသော မနာလိုခြင်းနဲ့ တကိုယ်ကောင်းဆန်ခြင်းများ ဆီရင် သမ္မာတရားဟို ဆန့်ကျင်ယွေ့ ဝါကြွားခြင်း၊ လိမ်ညာခြင်းလို့ဟို မပြုကြနဲ့။

15 အဲလိုသော ပညာဟ အထက်အရပ်မှ လာတာ မဟုတ်ဘဲ လောကနဲ့ လည်းကောင်း၊ ဇာတိနဲ့ လည်းကောင်း၊ နတ်ဆိုးလို့နဲ့ လည်းကောင်း စပ်ဆိုင်အယ်။

16 အကျော့န်းမှာ မနာလိုခြင်းနဲ့ တကိုယ်ကောင်းဆန်ခြင်း ဆိုသောနေရာတွင် ရုန်းရင်းဆန်ခတ်ဖြစ်ခြင်းနဲ့ ဆိုးညစ်သော အမှုအမျိုးမျိုးလို့ ဆိတတ်အယ်။

¹⁷ အားပေမဲ့ အထက်အရပ်မှ လာလဲ့ ပညာဟ ပထမနေ ဖြင့် သန့်ဆွတ်စင်ကြယ်အယ်။ အဲပင်းရင် ငြိမ်းချမ်းသော သဘော၊ နူးညံ့သိမ်မွေ့မှု၊ ခင်မင်မှုလို့ဟို ပြုစုတတ်အယ်။ ၎င်းဟ ကရုဏာနဲ့ ပြေစုံကြွယ်ဝယွေ့ ကောင်းမြတ်လဲ့ အကျင့်များတည်းဟူသော အသီးအပွင့်လို့ဟို ဖြစ်ပွားစေ တတ်အယ်။ အဲပြင် မျက်နှာမလိုက်တတ်၊ ဟန်ဆောင်မှုနဲ့ ကင်းအယ်။

¹⁸ ငြိမ်းချမ်းမှုဟို ဖြစ်စေသောသူလို့ဟ ဖြောင့်မတ်ခြင်း အသီးရဲ့ မျိုးစေ့ဟို ငြိမ်းချမ်းစွာ ကြဲတတ်ကြအယ်။

4

လောကနဲ့ မိတ်ဆွေဖွဲ့ခြင်း

¹ နင်လို့တွင် ဆိသော စစ်တိုက်ခြင်းနဲ့ ခိုက်ရန်ဖြစ်ခြင်း လို့ဟ ပစကျောနဲ့ ဖြစ်လာကြလုန်း။ နင်လို့ထဲနှိုက် ပြိုင်ဆိုင် တိုက်ခိုက်နေကြလဲ့ နင်လို့ရဲ့ ကာမဂုဏ် ခံစား လိုသောစိတ်မှ ဖြစ်လာကြတာ မဟုတ်လော။

² နင်လို့ဟ မိမိလို့ အလိုဆိသောအရာများဟို မရနိုင် သဖြင့် လူ့အသက်ဟို သတ်ရန် အသင့်ဆိုကြအယ်။ မိမိလို့ ရမ်းဆွဲ လိုလားတောင့်တလဲ့ အရာများဟို မရနိုင်သဖြင့် အငြင်းပွားကြအယ်။ နင်လို့ လိုလားသောအရာဟို မရဆီ ကြလဲ့ အကျောန်းမှာ ဘုရားသခင်ဆေဟို မတောင်းဆွှာ က်ကြသောကျောနဲ့ ဖြစ်အယ်။

3 နင်လို့ တောင်းဆောက်ယွေ့ မရခြင်းမှာ ရည်ရွယ်လွဲ
မားလျက် မိမိလို့ စည်းစိမ်ခံစားမှုအတွက် သာရင် တော
င်းဆောက်တတ်သောကျောက်နဲ့ ဖြစ်အယ်။

4 ဖောက်ပြန်သောသူလို့၊ လောကနဲ့ မိတ်ဖွဲ့ခြင်း ဟ
ဘုရားသခင်ဟို ရန်ဘက်ပြုခြင်း ဖြစ်ကျောက်နဲ့ နင်လို့ မ
သိကြသလော။ အဲကျောက်နဲ့ လောကရဲ့ မိတ်ဆွေ ဖြစ်လို
သောသူဟ ဘုရားသခင်ရဲ့ ရန်သူ ဖြစ်အယ်။

5 အဲဟာမဟုတ်ရင် ကျမ်းစာဟ “ကိုယ်တော်သည် ငါ
လို့နှိုက် ကိန်းဝပ်စေသော ဝိညာဉ်တော်ဟို သဝန်တိုသော
သဘောဖြင့် တောင့်တအယ်”* ဟု အကျောက်နဲ့မဲ့ဆိုထား
အယ်ဟု နင်လို့ ထင်ကြသလော။

6 အားပေမဲ့ ကိုယ်တော်ဟ ရမ်းဆွ ကြီးမြတ်သော
ကျေးဇူးတော်ဟို ပေးအယ်။ အဲလိုမို့ “ဘုရားသခင်ဟ
မာနထောင်လွှားသောသူလို့ဟို ဆန့်ကျင်ယွေ့ နှိမ့်ချသော
သူလို့အား ကျေးဇူးတော်ဟို ခံစားစေအယ်” ဟု ဆိုထား
အယ်။

7 အဲကျောက်နဲ့ ဘုရားသခင်ရဲ့ အလိုတော်ဟို လိုက်ကြ
လော့။ မာရ်နတ်ဟို ဆီးတားကြလော့။ အဲလိုမို့ သူဟ နင်
လို့ဆေမှ ထွက်ပြေးလိမ့်မယ်။

8 ဘုရားသခင်ဆေဟို ချဉ်းကပ်ကြလော့။ အဲလိုပြုရင်
ကိုယ်တော်ဟ နင်လို့ဆေ ချဉ်းကပ်လိမ့်မယ်။ အပစ်သား

* 4:5 ကိုယ်တော်သည် ငါလို့နှိုက် ကိန်းဝပ်စေသော ဝိညာဉ်တော်ဟို
သဝန်တိုသော သဘောဖြင့် တောင့်တအယ်။ အဲဟာမဟုတ်ရင်
ဘုရားသခင်ဟ ငါလို့နှိုက် ထားဆဲလဲ ဝိညာဉ်ဟို သဝန်တိုစိတ် ဆီအယ်။

လို့၊ နင်လို့ လက်ဟို စင်ကြယ်စေကြလော့။ စိတ်နေခွဆိ
သောသူလို့၊ နင်လို့ စိတ်နေလုံးဟို သန့်ဆင်းစေကြလော့။

⁹ စိတ်ညှိုးငယ်ခြင်း၊ စိတ်မသာညည်းတွားခြင်းနဲ့ ငိုက
ခြင်း ဆိကြလော့။ နင်လို့ရဲ့ ရယ်မောခြင်းဟို စိတ်မသာ
ညည်းတွားခြင်း ဖြစ်စေယွေ့ နင်လို့ရဲ့ ဝမ်းမြောက်ခြင်းဟို
ဝမ်းနည်းခြင်း ဖြစ်စေကြလော့။

¹⁰ ထာဝရဘုရားဆွေနှိုက် မိမိတတ်တိုင်း နှိမ့်ချကြ
လော့။ အဲလိုပြုရင် ကိုယ်တော်ဟ နင်လို့ဟို ချီးမြှောက်
လိမ့်မယ်။

စစ်ကြောစီရင်မှု မပြုရန် သတိပေးခြင်း

¹¹ ညီအကို မောင်နှမလို့၊ အချင်းချင်း တယောက်ဟို တ
ယောက် ကဲ့ရဲ့ခြင်းဟို မပြုကြနဲ့။ မိမိညီအကိုဟို ကဲ့ရဲ့ယွေ့
သူရဲ့ အပစ်ဆိတာဟု စီရင်သောသူဟ တရားဟို ကဲ့ရဲ့
အယ်။ ပညတ်တရားနှိုက် အပစ်ဆိတာဟု စီရင်အယ်။ အဲ
လိုပြုရင် နင်ဟ ပညတ်တရားဟို ကျင့်သောသူ မဟုတ်၊
ပညတ်တရားဟို စစ်ကြောစီရင်သောသူ ဖြစ်အယ်။

¹² ပညတ်တရားဟို ထားပိုင်သောသူ၊ စစ်ကြောစီရင်ပိုင်
သောသူ တပါးတည်း ဆိအယ်။ အဲသူဟ ကယ်တင်ခြင်း
ငှာ လည်းကောင်း၊ ဖျက်ဆီးခြင်းငှာ လည်းကောင်း တတ်
နိန်အယ်။ သူတပါးဟို စစ်ကြောစီရင်သောသူဟ စသူလု
နီး။

ကြားဝါမှု မပြုရန် သတိပေးခြင်း

13 “ခနော့၊ မနက်ခါနှိုက် ဟေမြို့ဟို သွားယွေ့ အဲအရပ်နှိုက် တနှစ်ပတ်လုံးနေလျက် ကုန်သွယ်ကာ အမြတ်ရအေနံ့ လုပ်ကြမယ်” ဟု ဆိုတတ်သောသူလို့၊ အခု နားထောင်ကြလော့။

14 နင်လို့ဟ မနက်ခါ စလိုဖြစ်မယ်ဟို မသိကြ။ နင်လို့ရဲ့ အသက်ဟ စလိုအရာဖြစ်လုန်း။ နင်လို့ဟ ခေတ္တခဏ ပေါ်လာပင်းနောက် ကွယ်ပျောက် သွားတတ်သော အခိုးအငွေ့ ဖြစ်ကြအယ်။

15 အဲကျောန့် “ထာဝရဘုရား အလိုတော်ဆီရင် ငါလို့ဟ အသက်ဆိုင်ယွေ့ ဟေအမှု၊ အဲအမှုဟို ပြုကြမယ်” ဟု နင်လို့ ဆိုသင့်အယ်။

16 အခု နင်လို့ဟ မိမိထောင်လွှားခြင်းနှိုက် ဝါကြွားကြသေးအယ်။ အဲသို့သော ဝါကြွားခြင်း ဆီသမျှဟ မကောင်းသောအမှု ဖြစ်အယ်။

17 အဲလိုမို့ စသူမဆို ကောင်းသောအမှုဟို လုပ်ဆောင်ရန် သိလျက်နဲ့ မလုပ်ဘဲနေသောသူဟ အပစ်ဆီအယ်။

5

ချမ်းသာသောသူလို့အား သတိပေးခြင်း

1 ချမ်းသာသောသူလို့၊ အခု နားထောင်ကြလော့။ နင်လို့ အပေါ် သက်ရောက်မဲ့ ဒုက္ခဆင်းရဲခြင်းများအတွက် ငိုကြွေးလော့။

² နင်လို့ရဲ့ စည်းစိမ်ဟ ဆွေးမြည့်ယွေ နင်လို့ရဲ့ အဝတ်များဟို ပိုးကိုက်စားလေပီ။

³ နင်လို့ရဲ့ ဆွေနဲ့ ငွေများဟ အချေးတက်လျက် ဆိပ်ပီ။ အဲအချေးဟလည်း နင်လို့ တဖက်နှိုက် သက်သေ ဖြစ်ယွေ နင်လို့အသားဟို မီးလို လောင်ကျွမ်းစေလိမ့်မယ်။ နင်လို့ဟ နောက်ဆုံးသော နေ့ရက်ကာလနှိုက် ဥစ္စာများဟို သိုမှီးထားကြလော့။

⁴ ကျေ့ကြလော့။ နင်လို့ လယ်ကွင်းနှိုက် ရိတ်သိမ်းပေးလဲ့ အလုပ်သမားလို့ဟို နင်လို့ ဝါယွေ မပေးဘဲနေသော အားခများဟ အော်ဟစ်နေကြအယ်။ ရိတ်သိမ်းသောသူလို့ရဲ့ အော်ဟစ်သံများဟလည်း ခေါ်ခင်းခိုလ်ခြေအဆိုင် ထာဝရဘုရားရဲ့ နားဟို ရောက်လေပီ။

⁵ နင်လို့ဟ လောကတွင် အပျော်ပါးလိုက်စားယွေ ဇိမ်ခံနေကြပီ။ အသတ်ခံရကြမဲ့ နေ့အတွက် မိမိလို့တတ်တိုင်း ဆုဖြိုးအောက် ကျွေးမွေးကြပီ။

⁶ နင်လို့ဟ ဖြောင့်မတ်သောသူဟို အပစ်ဆိတာဟု သတ်မှတ်ယွေ သတ်ကြပီ။ သူဟ နင်လို့ဟို ဆီးတားခြင်း မပြု။*

သည်းခံခြင်းနဲ့ ဆုတောင်းခြင်း

⁷ အဲ ကျော နဲ့ ညီ အကို မောင်နှမ လို့၊ နင် လို့ ဟ သခင်ဘုရား ကြွလာလဲ့တိုင်အောက် သည်းခံယွေ စောင့်နေကြလော့။ လယ်သမားဟ မိမိမြေမှ ဖိုးထိုက်သော အသီး

5:2 မ ၆:၁၉ * 5:6 သူဟ နင်လို့ဟို ဆီးတားခြင်း မပြု။ အဲဟာမဟုတ်ရင် လူလို့။ ဘုရားသခင်ဟ နင့်ဟို ဆီးတားမှာ မဟုတ်ဝူး။

နှံများ ထွက်ရန် မိုးဦးနဲ့ မိုးနှောင်း ရွာပီးလဲတိုင်အောင် စောင့်မျှော်တတ်အယ်။

⁸ နင်လို့ဟလည်း သည်းခံယွေ့ စောင့်မျှော်နေကြလော့။ သခင်ဘုရား ကြွလာလဲ နေ့ရက်ကာလဟ နီးကပ်လာပီ ဖြစ်ယွေ့ နင်လို့ရဲ့ မျှော်လင့်ချက်ဟို ခိုင်မာစေကြလော့။

⁹ ညီ အကို မောင်နှမ လို့၊ စစ်ကြော စီရင် ခြင်း နဲ့ ကင်းလွတ် မဲ့ အကျော န်း အချင်းချင်း ငြင်းခုံ ပစ် တင် ခြင်းဟို မပြုကြနဲ့။ တရားစီရင်ပိုင်သောသူဟ ထင်ခါးနား မှာ ရပ်နေအယ်။

¹⁰ ညီအကို မောင်နှမလို့၊ ထာဝရဘုရားရဲ့ နာမဟို အမှီ ပြုယွေ့ ဟောပြောသော ပရောဖက်လို့ဟ ဆင်းရဲဒုက္ခတွေ့ ခြင်း၊ သည်းခံခြင်းရဲ့ ပုံသက်သေဟို ပြကြပီဟု မှတ်ကြ လော့။

¹¹ သည်းခံနိုင်သောသူလို့ဟ မင်္ဂလာဆီသူ ဟူယွေ့ ငါ လို့ ခေါ်ကြအယ်။ ယောဘဟ သည်းခံကျောန်းဟို နင်လို့ ကြားရကြပီ။ ထာဝရဘုရားဟ မိမိအမှုဟို လက်စသတ် ရာမှာ ရမ်းဆွဲ ကရုဏာထားကျောန်းဟိုလည်း သိမျှော်ရ ကြပီ။

¹² ညီအကို မောင်နှမလို့၊ အထူးသဖြင့် ကျိန်ဆိုမှုဟို မ ပြုကြနဲ့။ ခေါင်းခင်၊ မြေကြီးဟို တိုင်တည်ယွေ့ မကျိန်ဆို နဲ့။ ပစာအရာဟိုမျှ တိုင်တည်ယွေ့ မကျိန်ဆိုနဲ့။ နင်လို့ဟ ဟုတ်တာဟို “ဟုတ်အယ်” မဟုတ်တာဟို “မဟုတ်ဝူး” ဟု

သာ ပြောဆိုကြလော့။ အားမဟုတ်ရင် တရားစီရင်ခြင်း
ဟို ခံရလိမ့်မယ်။

¹³ နင်လို့တွင် ဆင်းရဲဒုက္ခခံရသူဆိုရင် သူဟ ဆုတောင်း
စေ။ ဝမ်းမြောက်ရွှင်လန်းသောသူဆိုရင် ချီးမွန်းသီချင်း
ဟို သီဆိုစေ။

¹⁴ ဖျားနာသောသူဟ အသင်းတော်အကြီးအကဲများ
အား ဖိတ်ခေါ်စေ။ သူလို့ဟ သခင်ဘုရားရဲ့ နာမဟို အမှီ
ပြုယွေ့ ဆုတောင်းကြစေ။

¹⁵ ယုံကြည်ခြင်းဖြင့် ဆုတောင်းခြင်းဟ လူနာအား
ကျန်းမာစေလိမ့်မယ်။ သခင်ဘုရားဟ သူ့အား ကျန်းမာ
လာစေယွေ့ သူပြုမိသော အပစ်များဟိုလည်း ဖြေလွှတ်
လိမ့်မယ်။

¹⁶ အဲလိုမို့ နင်လို့ဟ ကျန်းမာစေခြင်းဟို ခံရမဲ့အကျော
န်း တဦးနဲ့ တဦး မိမိရဲ့ အပစ်များဟို ဖော်ပြဝန်ခံလျက်
အချင်းချင်းအတွက် ဆုတောင်း ကြလော့။ ဖြောင့်မတ်
သောသူရဲ့ စိတ်အားထက်သန်လဲ့ ဆုတောင်းချက်ဟ ရ
မ်းဆာ့ တန်ခိုးပါယွေ့ ထိရောက်မှု ဆီအယ်။

¹⁷ ဇေယဟ ငါလို့လို သာမန် လူသားတဦး ဖြစ်အယ်။
သူဟ မိုးမရွာစေရန် စိတ်အားထက်သန်စွာ ဆုတောင်း
သောအခါ သုံးနှစ်နဲ့ ခြောက်လတိုင်တိုင် မြေပေါ်နှိုက် မိုး
မရွာဘဲ နေအယ်။

¹⁸ အဲပင်းရင် သူဟ နောက်တဖန် ဆုတောင်းသောအခါ

ခေါင်းခင်မှ မိုးရွာသွန်းယွေ့ မြေဟ အသီးအနှံများကို
ဖြစ်ထွန်းစေအယ်။

¹⁹ ညီအကို မောင်နှမလို့၊ နင်လို့တွင် တစုံတယောက်
သောသူဟ သမ္မာတရားလမ်းမှ လွဲသွားယွေ့ တစုံတဦးဟ
သူ့ဟို ပြန်လည်ခေါ်ဆောင်လာရင်

²⁰ အပစ်ဆိသောသူဟို မားယွင်းသောလမ်းမှ ပြန်စေ
သောသူဟ အပစ်ဆိသောသူရဲ့ စိတ်ဝိညာဉ်[†]ဟို သေခြင်း
မှ ကယ်တင်ယွေ့ ရမ်းဆွဲသော အပစ်လို့ဟို ဖုံးအုပ်တတ်
တာဟ အဲသူဟ သိမှတ်စေ။

5:20 ၁ ပေ ၄.၈ [†] **5:20** အပစ်ဆိသောသူရဲ့ စိတ်ဝိညာဉ်၊
အဲဟာမဟုတ်ရင် သူ့စိတ်ဝိညာဉ်။

ဓမ္မသစ်ကျမ်း နေဘာသာစကား

Danu: ဓမ္မသစ်ကျမ်း နေဘာသာစကား (Bible)

copyright © The Word for the World International

Language: (Danu)

Contributor: The Word for the World International

နေ ဓမ္မသစ်ကျမ်း

The New Testament in Danu Language

The Word for the word

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

- You include the above copyright and source information.

- If you make any changes to the text, you must indicate that you did so in a way that makes it clear that the original licensor is not necessarily endorsing your changes.

- If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-01

PDF generated using Haiola and XeLaTeX on 1 May 2025 from source files dated 1 May 2025

8aba2da5-2a35-5ff6-9d27-1e96563449b2